

تستغيث ام المصايب يا أمير
قوم يا حيدر ترى عز المجير

وين ابو الحسنين حمّاي الدخيل
ينظر ابنه حسين بالحومه جديل
جسد ابلا راس بدمومه غسيل
عاري مرمي بالعرا ابجرّ الهجير

فوق جسم حسين عبدالله الرضيع
ابصره لمهشّم نرف نحره القطيع
منذبح ضامي قضى بحال فضيع
انفطم بالسيف هالطفل الصغير

يا علي ابلطفوف حلت زلزله
على اعيالك يا عظم هالنازله
زينب اتحشمك تنادي معوله
بالحشا امن الخوف لوعات وزفير

انفطر قلب العقيله يا علي
فقدت ابساعه الحبايب والولي
خيّم اعليها الحزن ما ينجلي
تنخي كافلها على الشاطي عفير

ضاقت الحيله يسلطان النجف
عاين البدر الهواشم منخسف
واخته زينب تلطم الهامه أسف
ظلت ابلا والي ام قلب الكسير

لاح ظل بنتك بعد خدر او جلال
تبكي من تتذكر أيام الدلال
بَعْد اخوتها انسبت تركب اجمال
ما بقى الها لا محامي ولا نصير

عسكر ابن زياد ما فيهم رحيم
آه يسبع الموزمه وكهف اليتيم
قوم فك اقيود زينب والحريم
خَلَّص ابنك زين لعباد الأسير

قوم للطف يا علي يا حيدر
ادرك الحورا ترى هي محيره
بيد اعاديكم تروح ميسره
ما أحد عدها الغريبه تستجير

شافت المظلوم بالغيره انصرع
امهبر الأوداج والراس ارتفع
فوق حد لسان بانواره سطمع
يوم ابو الأكبر عليها شقد عسير

وين حيدر ما يجي يحضر هله
خل يشوف ابهم شسوت كربلا
جملة اولاده ذبايح بالفلا
والظعن عنهم غصب جد بالمسير